



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 5

Yangia anidakangma :

Tir Yimyim

tiryimyim@aolima

tir yimyim

TAPAK 3



Kentener Dante Bowe-i maneni tekülem ken atentsü



"Ochiji teti jungkai adoker": Rahul Gandhi

VOL. XX NO. 103 (ADOK 103)

DIMAPUR RASEMNÜ (WEDNESDAY)

ANEJETI (JANUARY) 25, 2023

₹ 5.00

Republic Day sentong live sayutsü

Dimapur, January 24, 2023 (TYO): Nagaland Civil Secretariat Plaza, Kohima nung 74 buba Republic Day sentong live sayutsü ta Nagaland Home Department-i metetdaksüogo.

January 26, 2023 anepdang 8:45 ako nungi MyGovNagaland YouTube Channel nung iba sentong sayutsü.

Tejanrartemi YouTube aser Facebook nung MyGovNagaland page mesüra <https://youtu.be/0TvEaHmx9E0> nung iba sentong reprangtsü akok.

Kasa mapang DIPR Nagaland YouTube Channel nung nunga live sayutsü ta Home Department-isa metetdaksü.

Imkong L Imchen indang shidi agizükogo

Dimapur, January 24, 2023 (TYO): Imkong L Imchen-i MLA menden nungi sodi agia züluba shidi Nagaland Assembly-i agizükogo.

Imkong Imchen ya Nagaland chief minister Neiphiu Rio'er Nationalist Democratic Progressive Party (NDPP) telok nung dena liasü saka January 20, 2023 nü pai assembly menden yutsüba sülen BJP nung denogo.

January 23 nü Assembly secretariat-i sangdong ka nung "Imkong Imchen-i 13 buba Nagaland Assembly nungi

anenba shidi NLA Speaker Sharingain Longkumer-i agizükogo" ta metetdaksü.

Imkong Imchen-i menden yutsüba sülen Mokochung district kübok 28 Koridang assembly constituency tazüing kümogo ta Speaker-isa metetdaksüogo.

Imkong ya 2003 nungi 28 Koridang assembly constituency nung kümsük pezüben tashi MLA inyaka aruogo. Pai January 20 nü assembly menden yutsüba sülen BJP nung züngsem aküm.

SC-i Assam nungi diploma holders noktanger

New Delhi, January 24, 2023 (Agencies): Assam nungi diploma holders-i shirangertem temang anepaluba noktanger ta Supreme Court-i metetdaksüogo.

Mongulbarnü Supreme Court-i Assam Rural Health Regulatory Authority Act 2004 agien aser diploma holders-i yimtsüngtem nung shirangertem nem mozü agütsüba aser anepaluba noktanger.

Asaam sorkari küm 10 shi tejaklen küm asem diploma

course tenzüka liasü. Iba ya rural healthcare infrastructure tashi aittsü atema tenzüka liasü.

Supreme Court nung Justice BR Gavai aser Justice BV Nagarathna na adenba bench-i taoba mapang Gauhati high court-i obendang agüja aliba pusema nungit.

"Ibala mesükba medical education ketdangsütsü atema yangluba Assam Act ya agiena atar. State sorkari item onük atema ozüing yanglutsü makok" ta Supreme Court-i ashi.

PM Modi indang documentary atema JNU-i Electricity & Internet shibang

New Delhi, January 24, 2023 (Agencies): Jawaharlal Nehru University (JNU) kaketshirtemi Prime Minister Narendra Modi indang BBC documentary ka Mongulbar nikongdang sayutsü sentong liasü saka ketdangsürtemi ibaji anema internet aser electricity magütsü.

JNU ketdangsürtemi memulungaka taonung 9:00 ako nungi iba documentary sayutsüba sentong liasü saka JNU office nung internet aser electricity magütsü.

Iba documentary sayura temerenshi alitsü ta JNU ketdangsürtemi ashi saka kaketshirtemi iba documentary sayuba ajanga JNU indang temzüng kecha meraksar mesüra tensa meraksar ta ashi.

"Onoki tanü documentary reprangtsü. Onoki QR code ajanga reprangtsü" ta Students Federation of India president Ayeshi Ghosh-i ashi.

JNU ketdangsürtemi internet aser electricity magütsüba sülen kaketshirtem campus nung aliba cafeteria kati ao aser idakji parnok indang cellphones nung documentary download ser reprangtep.

Taoba hopta Centre sorkari Twitter aser YouTube dang ashishitep aketba PM Modi indang BBC series agientsü atema tetuyuba agüja liasü.

Ajisüaka, opposition lennirtemi Centre aija kaketshirtemi iba documentary sayuba ajanga JNU indang mezüngbuba shilem reprangtetogo.

North East Democratic Front ta ser party tasen ka tenteter



Dimapur nung North East Democratic Front (NEDF) tenzükertem noksa ka angur.

Dimapur, January 24, 2023 (TYO): North east state asem nung general election agitsü hopta pezü shi dang anünga lia North East Democratic Front (NEDF) ta ser regional political party tasen ka Dimapur nungi tenzükogo.

NEDF indang omenji 'power to the people' lir. NEDF ya registered party ka lir saka Election Commission of India (ECI)-i ano magizük lir.

"NEDF-i tanü putu den apet democratic states akümtsü alizüing ayur. Onoki temeten aser

tim tangatetba nung amendaker party len anitsü" ta president Lima Longkumer-i ashi.

NEDF-i North east India tajungba yanglushitsü tenangzükba lir. Nisung ajak saku litetba loktiliba ka yangertsü atema onoki inyaksü, ta pai ashi.

"Pei sasa litetba, kija temeten aser linük telongjem nung ajemdaker party tenteter. Asenoki taruba sorkar ketdangsübaren asoshi renemdang, tarutsü putu lenitsü atema maparen tasen ka nüngdaker" ta NEDF president Lima-isa ashi.

"Tesüiba mapang NE state temi timtem jenti ajuruogo aser iba ya sorkar ketdangsübaren majungba aser lennirtem tashimaitba ajanga lir. Khuret aika mekokteti lir aser iba jagi asenok longjemra khurettem koktetsü ta ozü party-i amanger" ta paisa metetdaksü.

Taruba assembly elections nung NEDF-i candidate tem yaritsü, ta paisa ashi.

Iba party tenzüka sentong nung Meghalaya aser Karbi Anglong, Assam nungi party lennirtemia o jembu.

Nagaland CEO-i official garitem timi amshitsü tuyur

Dimapur, January 24, 2023 (TYO): Nagaland Chief Electoral Officer V Shashank Shekhar, IAS-i Deputy Commissioner, Additional Deputy commissioner, District Election officer aser Head of department ajak dang Election code of conduct beshitsü tetuyuba agütsüogo.

14 buba Nagaland Legislative Assembly (NLA) 2023 elections tiptema aser ochishia agitsü atema Election code of conduct beshiang ta pai ashi.

CEO Shashank Shekhar-isa political parties, candidates mesüra election dak sendakba nisung (Minister's, MLAs, Personnel Secretary, Personnel

Assistant to ministers, Advisors & MLAs) ajaki nüboyimba maparen nung official vehicles tim mesüi mamshitsü atema tetuyuba agütsü.

Official Vehicles nung Central & State government, Central aser State government indang Public undertakings, Central aser State government indang Joint sector undertakings, Local bodies, Municipal corporations, Municipalities, Marketing Boards (by whatever name known), Cooperative Societies, Autonomous Districts Councils, mesüra public senotsü dak sendakba telok ajak dena lir, ta

Nagaland CEO-i ashi.

Election duty atema lemzüka dak alaka officials vehicles mamshitsü atema ECI-i tetuyuba agütsüogo ta paisa ashi.

ECI Consolidated Instructions 2014 tetuyuba ajanga security vehicles alia convoy nung gari 10 tema mesenzütsü atema tenokdangba agüja lir, ta CEO Shashank Shekhar-i metetdaksü.

Paisa District Administration dang tenük yoktsü aser aibelenba putetra Representative of the People Act, 1951 nung Section 160 kübok election matem tashi garitem sota atatsü atema tetuyuba agütsü.

BJP Nagaland züngsem ajak anentsü amokmerener

Guwahati, January 24, 2023 (Agencies): Bharatiya Janata Party (BJP) aser NDPP tsüingda assembly menden atsütepiyalong nung BJP züngsem ajungai party toktetsü ta amokmerener.

BJP central leadership-i Nagaland nung BJP lennirtem aser züngsemtem ola mangashira parnok ajak party nungi anentsü ta jembiba osang angazüker.

Nagaland BJP state president Temjem Imna aser Deputy Chief Minister Y Patton nati taonung BJP national general secretary B L Santosh aser NEDA convenor & Assam Chief Minister Himanta Biswa Sarma na den ajuruteptsü ta osang ajanga ashi.

"Meghalaya nung BJP MLA ana dang lir saka BJP-i Mandal 60 prong nung tokteptsü, ajisüaka Nagaland nungbo menden 60 nungi 26 nung

dang toktepdaksür" ta BJP züngsemtemi lungkak aيتدang ashi.

Assam Chief Minister-i tanga state ka indang tarutsü asoshi telemtetba agitsü kechi tashi lir ta Nagaland BJP-isa asüingdang.

Külen, Bharatiya Janata Party (BJP) indang central committee-i Nagaland nung BJP aser NDPP tsüingda assembly menden lemsatepba ken o nung tebang aittsü telemtetba agiogo.

Dimapur nung Deputy Chief Minister Y Patton'er kidang BJP züngsemtemi lungkak aitiba sülen central committee-i iba lemtet agi ta osang ajanga ashi.

January 22, 2023 nü BJP ticket amer toktepnüa bilemba candidate tem pusemertemi Deputy Chief Minister Y Patton'er kidang lungkak aita liasü.

Parnoki par candidate atema

ticket meshi aser Nagaland nung BJP züngsemaikati NDPP aser BJP tsüingda 40-20 lemsaba atema mepelar.

Candidate temi State BJP leadership dang menden 30-30 lemsatsü atema shiogo.

January 29, 2023 matongdang BJP central lennirtemi iba atema telemtetba ka agitsü imlar.

"Teloktep nung terata kecha mali. Taoba mapang NDPP aser BJP tsüingda 40:20 lemsar toktep aser idangji BJP-i menden 20 nungi 12 nung takok angu. Tang BJP central leadership-i party ana tsüingda menden lemsaba aser teloktep indang metetdaksüogo. Anungji iba menden lemsar tokteptsüba ya party anaprongi jembitsüla" ta taoba mapang BJP Nagaland state in-charge Nalin Kohli-i shia liasü.

Rüsoma Orange Festival tenzükogo



Rüsoma Orange Festival nung tangokba noksa nung angur.

Kohima, Aenjeti/January 24 (TYO): Rüsoma Village Council ajanga ananü ayongzükba 3 buba Orange Festival sentong January 24, 2023 nü Kohima nungi kilometre 9 shi pilar Rüsoma village ground nung tenzükogo.

Iba sentong nung jembidang Festival Father aser Additional Director of Rural Development Department, K Neibou Sekhose-i ashiba agi, yimsüing nung telungjem aliba aser yimdakliri lenirtem den amalitep akaba ajanga iba ama benjong takok ngua ayongzükter.

Iba yagi sorkar dak kisü metaloka malitsü aser nüburtemia pei sasa mera agia entrepreneurship mapa aser danga rongsen lenmang aliba mapa inyaksü sayur, ta pai ashi.

Horticulture mapa nung nüburtemi temolung agütsüba atema District Horticulture Officer S Senka-i tenüngsang agüja liasü. Rongsenketzüng tajangzük tsütsü horticulture ya nükla tajung akaba farming sector lir aser employment

adokdaksür, ta pai ashi. Jenjang balala nung Horticulture Tourism nung rangloksü jenti lir aser tzüngsang-mopung melenba ajanga horti crops nung aiben mokongshir anungji tamakok ajuruba kangabo mali, ta pai ashi.

Horticulture farming ya alu tila ayimer asoshia tajangzük lir aser technology tsütsü tejakleni renloka aoba den lirumedema aluyimba nunga akhi yimya melentsüla, ta pai ashi.

Rüsoma Village Council ajanga iba benjongmung ya Horticulture Department, Smart City Kohima, Rural Development, Land Resources aser Agriculture Department den lungjemer ayongzükter.

Iba sentong ya Rüsoma Baptist Church indang pastor Krodilhau Vimera-i sarasademer tenzük aser Rüsoma Village Council chairman Kehouchükhrie Mezhier-i tarur pela agizükba o jembia liasü. Iba benjongmung ayongba committee tayonger

Khrielle Chase-i benjong teratet shia liasü.

Rüsoma nung ali hectare 70 shi nung naring ya tsünüa lir aser küm shia sen lakh 40 shi yokzükter, anungji mozü mamshi naring tsünüba wazüka ayutsü nükjidong nung Rüsoma Village Council ajanga iba benjong ya ayonger alitsü.

Iba benjong nung mozü mamshi tsünütetba naring aliba/achiba kisüing masü saka kenten-menü, tila tanur asayadak tesem, chiyongtsü ayokba tesem aser yangji yangluba coffee amala angur.

Kohima nung naring ya seret nung sen 150 agi alir saka yangji benjong mapang seret nung sen 110 agi ayoker.

Iba benjong ya Bodhbar nikongdang tembangtsü, kong naring tanangtiba aser tulutiba tokteptsü.

Iba benjongmung mezüing anogo nung best stall competition takok angur Thejasinuo Zhale, Ura Vie liasü aser stall tulutiba Vikuolie Ketientsu-i lapoka liasü.

Sector Officers/Commanders training agütsü

Dimapur, Aenjeti/January 24 (TYO): Aruya aliba 14th Nagaland Legislative Assembly atema General Elections atema Mokokchung District kübok Sector Officers/Magistrate aser Sector Commander asoshi training ka January 24, 2023 nü Deputy Commissioner Mokokchung indang Conference Hall nung agüja liasü.

Iba training mapang Sector Officers teinyaksü mapatem PowerPoint nung Dhritishree

Bordalai, DC Office Ministry of Skill Development and Entrepreneurship ajanga agüja liasü.

District Level Master Trainers temi EVMs amshiyim sayua liasü. Iba sentong nung Deputy Commissioner Mokokchung, Shashank Pratap Singh IAS, aser Superintendent of Police Mokokchung, Manoj Kumar IPS nungertemia election tajungtiba nung agütsü mechi training nung saksalema adentsü ayongzükba liasü.

Kohima nung tetsüing lenmang atsünga arurtem merenshitsu

Dimapur, Aenjeti/January 24 (TYO): Deputy Commissioner, Kohima ajanga sangdong ka nung ashiba agi, Kohima nung lenmang anasa kisü-jensü nung amshiba oset, tyres, gari yanglushiba workshop, süngpak & süngkum ayokba, Iron fabrication, aben süoshi aser osettsüset ayokba dokan temi tetsüing lenmang agua osettsüset nangtena ayur, ajisüaka item lenmang ya nüburtem senzüsempongtsü atema lir.

Nübur jajaba lenmang ozüing alema yamaji agiba ajanga nüburtem nem timtem balala agütsür, anungji dokan kibur temi khen atema süshia teti asoshi süshia nisung jajaba lenmang nung iba ama osettsüset nangtena temdangsunangba lira Control of National Highways (Land & Traffic) Act, 2002 aser Eviction of Unauthorised Occupants Act, 1971 kübok tapet temerenshi agütsütsü, ta kasa sangdong ajangasa ashi.

R-Day nung NGO stemi tesem balala semdangtsü lemsatsü

Dimapur, Aenjeti/January 24 (TYO): Republic Day tenüing nung January 26, 2023 nü club/NGOs temi Homes/Institution balala semdangtsü asoshi Deputy Commissioner Kohima, Shanavas CIAS ajanga lemsatsüo aser itemji yamai alitsü:

Royal Club Kohima-i State Mental Health Institute semdangtsü; Gorkha Public Panchayat Kohima ajanga Kohima Orphanage & Destitute Home semdangtsü; Muslim Union Kohima ajanga District Jail Kohima

semdangtsü; Lions Club Kohima ajanga District TB & Chest Disease Hospital, Khuzama semdangtsü; Kohima Chamber of Commerce & Industries (KCCI) ajanga Naga Hospital Authority Kohima (NHAK) semdangtsü; Spikes Club Kohima ajanga Old Age Home semdangtsü; Kerala Club Kohima ajanga KRIPA Foundation semdangtsü aser DC's Office Kohima nung aliba Dobashis temi Parade Ground nung nanglong lemsatsütsü.

NSCN/GPRN ajanga gari ka nguteta lir

Dimapur, Aenjeti/January 24 (TYO): NSCN/GPRN (Niki) teloki Etios Liva (Toyota) gari ka nguteta lir. Iba gari nung Engine No. M25G160058B2 aser Chassis No. MJBK30ET908047809 alitsü, ta sangdong ka ajanga ashi.

Iba gari indang kiburi gari ya iba osang sangdongba anogo nungi tenzükba anogo tenet (7) tsüngta nung ashishitsu metetdaksür. Kiburi phone number 9366022688 ajanga jembitsü akok, ta sangdong ajangasa ashi.

ATI nung NSS (P) 35 aser NCS (P) 10 tashi Foundation Course agitsü

Dimapur, Aenjeti/January 24 (TYO): Vision Nagaland Hall, Administrative Training Institute Kohima nung January 24, 2023 nü NCS (P) 2023 Batch Foundation Course aser 52nd Batch NSS (P) Foundation Course indang combined inaugural function agia liasü.

Director General, ATI & APC, Nagaland Kohima, R. Binchilo Thong, IAS ajanga ashiba agi, Civil Servant tem ya state asoshi tongtoret lir, nübur aser sorkar tsüngta apo ama inyaker, kechiaser sentong ajak parnok ajanga inyaker.

Yimten yimsüsürtem küm pungo shia melentsü akok saka civil servant tem nübur ajangzüktsü asoshi küm aika inyaksü aser sorkar mapa nung tasen aiter asünung training ya kanga tongtipang akumer, kechiaser sorkar mapai maitdang shisaliok ngua aliba ya timba degree dak rangloker lir, saka training yagi angazükba aser mapa kuma inyakba nung tawa süngtsür, ta pai ashi.

Training ajanga shisatsü agütsüba kisüing masü saka



ATI Kohima nung January 24, 2023 nü NCS (P) 2023 Batch Foundation Course aser 52nd Batch NSS (P) Foundation Course indang combined inaugural function agidang tangokba noksa ka nung training agirtem den Director General, ATI & APC, Nagaland Kohima, R. Binchilo Thong, IAS, aser ATI ketdangsurtem tangokba noksa nung angur.

mapa inyakba tesem nung amshitsü yimyattem sayur, mapa ochishia shidak inyaksü angazükdaksür, yimya tajungba melenshitsu aser mapa inyakba yimya sübadaksür, ta ashi.

NCS aser NSS (Probationers) tem sorkar mapa ya ATI nung Foundation Courses agia tenzükter, ta pai ashi.

NSC (P) pur den jembidang, civil service ya sorkar indang temolungjang amai lir aser

nenok district aser sub-division nung field officer ka ama tenzüktsü aser tanem-tanemi temaba jenjangi ajungketa department balala nung tongti shilem agir, ta Binchilo Thong-i ashi.

NSS ya shisatsü, tzüzüng-ozüing, inakyim balala aser Secretariat nung file aser kaket mapa bendena ayudak tesem ka amai lir, koba state sorkar indang menden lir aser IAS aser NCS nungi tenzükba danga service officer temi NSS

Officer tem nungi angazüktsü jenti lir, kechiaser parnok Secretariat nung teti alir, aser Secretariat indang gol ka amai lir, anungji temaba jenjang nung aliba ketdangsur tem tajungtiba nung len sayua anitsüla aser sorkar sentong balala yangluba nung tongti shilem agitsüla, ta pai ashi.

NCS aser NSS ka kasa tongtipang lir, kechiaser state indang administration repringba nung parnok külemi inyaker aser nükjidong kasa lir, state nung

nübur tenzüktsü, sorkar scheme aser sentong tem mapa kuma takok ngua inyaksü, ta Director General, ATI & APC ajangasa ashi.

Paisa training agirtem dang ochishia inyaksü, nüburtem den tesendaktep tajung yanglutsü, jembishinü tajung asütsü, tensa den apet mera agitsü aser tebilemsü khuret ajurudang yimya tasen amshia itemji kottetsü ajungshia liasü.

Iba courses indang tongmelang agi Joint Director & Course Coordinator for NSS (P) Foundation Course, Kaholi Sema, aser Assistant Director & Course Coordinator for NCS (P) Foundation Course, Dr. A. Alem W. Longchar nati lemsatapa liasü. Iba sentong nung menden Additional Director (Admin), ATI & Joint Secretary, Labour & Employment, Bendanglila, NCS liasü.

Maneni sentong nung Khumrila Thonger, NSS (P), aser Imkongnukla Ao, NCS (P) natia o tatsütsü jembia liasü. Iba foundation course agir NSS (P) 35 aser NCS (P) 10 lir.

"Ochiji teti jungkai adoker": Rahul Gandhi



January 24, 2023 nü Jammu district nung 'Bharat Jodo Yatra' sentong akaba mapang Congress leaders Rahul Gandhi den KC Venugopal aser Bollywood actor Urmila Matondkar densema sentong nung shilem agiba noksa nung angur.

New Delhi, Aenjeti/January 24 (Agencies): Rahul Gandhi-i Mongolbarnü 2022 küm Gujarat nung mepetmesü adokba indang BBC documentary ka indang jembio, koba ajanga India aser tanga linüktem nung mepetmesü adokogo.

"India: The Modi Question" documentary tanabuba shilem ya United Kingdom nung Mongolbarnü 9:00 ako (local time) nung sayatsü liasü. Ministry of External Affairs-i, Gujarat nung Modi Chief Minister inyaka aliba mapang mepetmsü tulu adokba dak sendakba nung BBC-i otsü yangluba ya aitsüogo aser iba ya "propaganda" ka ta shiogo.

Iba mepetmesü dak sendakba nung Rahul Gandhi-i, "nai asenok indang scripture zünger lira, nai

Bhagwat Gita mesüra Upanishads zünger lira, ochji teti jungkai adoker ta meteter alitsü. Nai tenokdangba agütsütetsü, press tashiyim agi nokdangtsü akok, nai institution tem azüoktetsü, nai CBI, ED (Enforcement Directorate) amshitetsü akok, saka ochijibo ochi sa asütsü," ta ashi.

"Ochiji kanga sangwa ayar aser teti jungkai adoker. Anungji tenokdangba balala agütsüba nüburtem tsübudakja amokmerenba ajanga ochi jungkai adokba menokdangtetsü," ta pai BJP aija ashi.

Taoba hopta Centre sorkari social media nung iba documentary ya nokdanga liasü aser Twitter-i post aika agintsüogo. Opposition lenirtem

aikati iba jenjang agiba ya "censorship" ka ta ashir.

Ken o dak sendakba nung telangzüba agütsüba mapang MEA-i, iba documentary yagi tanga linüktem den tesendaktep raksatsütsü. Iba documentary sayaba mapang nungi BJP lenirtemi aija arudar aser ashiba agi, Supreme Court-i iba ken o dak sendakba nung telemtetba agiatokogo.

Iba ken o ya tanga linük nunga benoka sensaksemogo. UK PM Rishi Sunak-i taoba hopta ashiba agi, documentary nung PM Modi shilem indang sayaba ya paia magizüker. US State Department otongdar Ned Price-i iba hopta, pai iba documentary indang mejangja ta shia telangzüba kecha magütsü.

Baramulla nung kiralongrar züngoksemba module ka potet

New Delhi, Aenjeti/January 24 (Agencies): Security forces temi Jammu and Kashmir kübok Baramulla district nung kiralongrar recruitment module ka potetogo, koba Pakistan nung handler temi social media ajanga achaayanga liasü, ta police ketdangsur kati Mongolbarnü metetdaksü.

"Juvenile ana densema lanur pongu kiralongrartem ket nungi kümzükgogo aser o tashitim shir Baramulla district kübok Pattan tesem nung par tsürapur nem bendanga agütsüogo," ta Senior Superintendent of Police Amod Nagpure-i Pattan nung osang benertem dang ashi.

Pai ashiba agi, police aser army na senteper iba module ya kaktetogo, kong Pakistan nung handler temi social media ajanga lanurtem kiralongrar telok nung densema India sorkar anema inyaksangshitsü asoshi atsüa arutsü meranga liasü.

"Nisung tejangja nungi osang angazükba sülen, kiralongrar teloktem nung adentsü atema Pakistan nungi terror handler temi lanurtem atsüa arutsü meranga aliba jangja liasü.

"Security force temi tamasa item lanurtem bushia ao aser parnok tsürapurtem teyari agia parnok dang ken o balala ashishia liasü. Parnoki osang agütsüba

sülen item lanurtem den Pakistan nungi terrorist handler tem den social media ajanga sendaktepa liasü ta jangja aküm," ta ketdangsurü ashi.

Paissa, item kiralongrartem yagi lanurtem anisatsü meranga liasü, ta ashi. "Parnok ajak ya teburchanutem dang liasü aser ken o tashitsü tim ajak angateta ashiba sülen tsürapurtem nem bedanga agütsüogo," ta pai ashi. Nagpure-i ashiba agi, tsükchirtem tasa balala nokdangtsü atema security forces bendanga agütsür lir, ajisüaka tsürapurtemia pei chirnurtem inyakyim meita atatsüla aser police den teka amteper inyaksüla.

Aero India 2023 nung exhibitor 731 züngoksemogo

New Delhi, Aenjeti/January 24 (Agencies): 14buba Aero India atema exhibitor 731 züngoksemogo. Iba ya India indang premier global aviation trade fair lir, koba Bengaluru nung February 13 nungi 17 tashi agitsü, ta defence ministry-i Mongolbarnü ashi.

'The runway to a billion opportunities' omen nung ajemdaker anogo pongu agitsü aliba sentong ya Air Force Station, Yelahanka nung agitsü, kong 'Shared Prosperity Through Enhanced Engagement in Defence (SPEED)' omen nung ajemdaker Defence Ministers' Conclave ka aser CEOs Roundtable sentong ka densema lir. Fair amungba mapang anogoshia air show alitsü aser Aero India 2023 mapang Manthan start-up event aser Bandhan ceremony nung tenangzüktepba balala yanglutsü.

"Hadir balala tangalen nung belener arutsü atema sentong yangluba dang masü, tangar den tesendaktep yanglua defence exports ajungkettsü asoshi iba sentong ya yanglushiogo," ta defence ministry-i ashi.

Iba dak sendakba nung Mongolbarnü New Delhi nung apex committee senden ka menogo, kong Defence Minister Rajnath Singh-i iba sentong asoshi renemshiba asadanga liasü. Pai sentong dak sendaka alir ajak dang sentong nung shilem

agitsüpurtem atema jenjang tapet agitsütsü ayongzükogo. "Pai ashiba agi, Aero India 2023 ya sentong ka dang masü saka defence aser aerospace sector renloka aoba sayatsü aser tangar dak memetaloki aliba tashitait India ka inteta aoba indang sayatsü asoshi lir," ta kasa sangdong ajanga metetdaksü.

Minister-isa, Indian defence industry melenshiba mapang ka lir aser private sector temi shilem agiba ya temelenshi tulutiba asütsü, ta ashi. "Private sector dang masü saka R&D establishments aser academia tem sorkar den longjemer inyakdar. Aero India ya külemi longjemer defence aser aerospace sector tashi taitba kümdaktsütsü asoshi sabang ka lir aser iba ajanga linük yangerba nung teyari agütsütsü," ta pai ashi.

Singh-isa, Aero India ya business event ka aser iba sentong ayongzükaga agiba nükjidingji tanga linüktem den India tesendaktep tajungba küma yanglushitsü atema lir aser iba den sentong ayongzükaga agiba state indang business ecosystem atema kanga tongtibang asütsü, ta ashi.

Maneni pai, iba sentong ajanga Karnataka ya aviation aser aerospace industry teyongtsü ka kümdaktsüdar ta ashiba den state ya linük rongsenketzung renloka aoba nung tongti shilem agir ka kümogo, ta shisem.

'Congress-i Pakistan pusemer': CM Chouhan

Bhopal, Aenjeti/January 24 (Agencies): Digvijaya Singh-i surgical strike dak sendakba nung pa tebilemba lemsatepba aija jembiba mapang Madhya Pradesh Chief Minister Shivraj Singh Chouhan-i Mongolbarnü ashiba agi, "Congress DNA agibo Pakistan pusemer."

"Congress indang DNA agi Pakistan pusemer. Parnoki (Congress) kenkenbo surgical strike indang kuli meshir aser mapang mapang nungbo Ram taküm aliba indang kuli meshir. Tanga Digvijay Singh-i Bharat Jodo Yatra nung jajaba mapang surgical strike indang kuli meshiogo. Singh-i sepaitem demoralize süja tai menaogo. Pai pa Pakistan den nokdaka lir ta sayur," ta Chouhan-i state yimtiba Bhopal nung Mongolbar anepdang osangbenertem den sensaksemba mapang ashi.

Digvijay Singh-i Hombarnü ashiba agi, Centre nung BJP sorkari Pakistan nung surgical strike asüba idang jembir saka iba indang kuli mali.

"Parnoki (Centre) surgical strikes indang jembir aser parnoki kiralongrar aika tepsetogo ta ashir saka kuli kecha mali," ta Congress lenir yagi Jammu nung Bharat Jodo

Yatra sentong ayongzükaga agiba mapang ashi.

BJP lenir yagisa Rahul Gandhi kodaser yatra nung "Tukde-tukde gang" den senzür ta ashi.

"Ni Congress lenir Rahul Gandhi dang iba ya kech amala Bharat Jodo Yatra ka ta asüngdangner. Tukde Tukde gang nü den jajar, army indang morale tajemba kümdaktsür aser Rahul Gandhi-ia army tashi indang asüngdangner. Iba ya linük mamba temaitsü masü. Congress-i army indang moral-bosa majemtsüsüla," ta chief minister-i ashi.

Maneni Chouhan-i, Digvijay Singh-i anir sorkar kümteter aliba mapang Madhya Pradesh ya SIMI (Students' Islamic Movement of India) indang tamendakdak tashitait ka liasü ta ashi.

2019 küm February 14 nü telungpurtemi Kashmir kübok Pulwama tesem nung CRPF convoy ka amak aser sepai 44 tepseta liasü.

Iba sülen February 26 nü Indian Air Force fighter jet temi Pakistan kübok Balakot tesem nung amenoker aliba Jaish-e-Mohammed pur indang training camp ka maka liasü.



UCO BANK
Zonal Office, Jorhat,
Assam

POSSESSION NOTICE
For Immovable Property
(UNDER SARFAESI ACT 2002)

Possession U/S 13(4) of the Securitization and Reconstruction of Financial Assets and Enforcement of Security Interest Act, 2002

Whereas, the undersigned being the Authorized Officer of UCO Bank under the Securitisation and Reconstruction of Financial Assets and Enforcement of Security Interest Act, 2002 (No. 54 of 2002) and in exercise of powers conferred U/s 13(12) read with Rule 8 of the Security Interest (Enforcement) Rules 2002, calling upon the borrowers and guarantors in the loan account to repay the amount mentioned in the notice plus interest and other charges, thereon within 60 days from the date of receipt of the said notice.

The borrowers/ guarantors/ mortgagers mentioned below having failed to repay the amount, Notice is hereby given to the borrower/Guarantors and the public in general that the undersigned has taken possession of the property/properties described herein below in exercise of powers conferred on him/her under section 13(4) of the said act read with Rule 8 of the said Rules on the date mentioned below. The borrower(s) and Guarantor in particular and the public in general are hereby cautioned not to deal with the property/properties mentioned below and any dealings with the property/properties will be subjected to the charges of the UCO BANK for an amount mentioned below and interest thereon.

A/c No. Name & Address of the Borrower & Guarantor	i) Date of 13(2) Notice ii) Date of Symbolic Possession iii) Amt. O/s at Demand Notice	Description of the Property
A/c No: 19750610005293 Borrower: Mrs Asangla and Mr, Ungmatoshi Longchar H/No. 69 Naharbari Village, Dimapur -797112. Guarantor : I KIKATOSHI, S/o Lt. Imo, H/No. 165 Naharbari Village, Dimapur-797112.	i) 02.11.2022 ii) 19.01.2023 iii) Rs. 24,10,324/- + further interest & cost.	All that part and parcel of the property consisting of land measuring 018-02K-04L covered under Dag No-203, Patta No-89, situated at Block Naharbari AK, under Mouza No-3, Dimapur, Area 20736 Sq. Ft. Bounded : North : Approach Road. East : Approach Road . West : Property of Ezamo Lotha. South : Approach Road.

Place : Dimapur
Date : 20.01.2023

Authorized Officer
UCO BANK



TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 25, 2022

Asenoki candidate koma yarir ?

Tanü ya linük ajaklen 13 buba National Voters Day amonger. Iba anogo nung ya senso shia asoshi vote ya koda tashi tulu aser tongtibang itemji bilemdangtsü aser sentongtem ayongzüka jembitsü. Aji oda, asenoki election nung yimsüsür shimtsü atema vote jang ka enoktsüba yagi asung asen taküm aser kibong tia dak kongshitsü. Tanü vote jang ka enoktsüba tashi jagi asung asen nungdak ataloktsütsü mesüra asen nungdakbo kata meinyaktsüi ajak südena bener aotsü. Iba jagi election anogo ya asenok ajak asoshi kanga tongtibang, kechiyong asen nem yimsüsür shimtsü maongka, temeten aser tashi agütsübaji atamata masü. Iba temeten aser tashi angatettertemi election matongdang sen aser mapa yong vote meyoki atar, election anogo nung timtema asüyonga tangar den tarensena nokdaker pei vote pei mulungba candidate nem enoktsür. Aji oda, vote enoktsür ka asoshi tepelatiba anogoji peii yariba candidate election nung adokba anogo aser tejashitiba anogoji election nung peii yariba candidate madokba anogo lir. Vote enoktsür ka asoshi iba ama takok aser tamakok anogo indang jembidang, süra asenokia aseni yariba candidate sangji koma yarir (?) ta bilemdangtsüsa adoker. Asen lima election agiba osangtem nung aiben tesem aika nung yimtsür yimer aser lokti tentet longjemer yariba osang angashir. Atangji, longjemer yarir asünungji parnok aikati takok angur. Ajisüaka, nübortem jagi komaka yarir adokdaksür ta asübaji kanga tongtibang lir. Tanü yangi iba onük tazüngertem den lemsatepnüba ya asenok ajak asoshi kanga aroka shisadangtsüsa asenoki ngua atalokbatem aika angur. Item tatalokbatem rongnung ka tanü yangi lemsatepnübaji, nübortemi yaria adokdaksüba MLA aser minister aika sentsütsür kuma aoba ya lir. Asenok nübortem dang, yamaibo nung, majunga ta asüyonga maa ta asenoki asen yimer longjemer senso candidate shimer, saka tatem nungbo asenok ajaki longjemer yariba nisung to alima nunga junga melitetsüsa sentsütsür kümdaksür. Aji kechi komaka sensosanger longjemer yariba ta süngmangseta bilemer. Kasaji, Dimapur ama alima tasen nunga, asenok Aor ajak longjemer asen nisungsa ka yaritsü bangjemteper election-i yoker, Dimapur nung nütsünyongsüka asenoksa teimba moaja lir asünungji, asenoki akoker. Ajisüaka, Aor ajak longjemer yarisang tobo pei akaba ali kimong aser kiojen ajak ayokyonga election sentsü matutsüsa longjemer yarirtemi sentsü tsüa yutsür. Iba ama osangji angashi dang, süra Aortemia komaka yarir-ar na (?) ta bilemer. Asenokibo nisung ka yari nung sentsütsür-ang akümer na? Ajibo meyariong tajungba ta bilemer. Aji oda, tanü ama senso shia pei vote jenjang meteta election nung shilem agitsü jembidang, asen meyong vote yoka election nung shilem agibajibo teyarir masü saka timtem agütsür ka dang asütsü. Tangar kintem indang mejembili, saka asenok Aortem rongnung election nung asenoki yarirtem candidate kwika sentsütsür kümdaksür asütsü ? Joko, tang yabo Mokokchung district nunga sang mesüra Dimapur aser Chumukedima district nunga sang, election nung candidate yarir süra shitakba tangatetba agi yaridi aser candidate-ji tatar senden nunga aser kima yimdong nunga nümadangdanga asenok nungdak jembitetsüsa pa mesüra laji sentsütsür mekümdaksüli. Tangalenbo, party nung inyakertemi anir candidate atema senotsü lenmang bushia jajar, kasaji asenokia inyaktetsü. Aji oda, candidate dang pei vote ayoktsü melen asenokiang candidate nem pei akok tenla agütsüdi. Asen constituency nung asenok nisung meyi kati aseni yariba candidate nem sen meyi pongngo danga tenla agütsüra sen ajak agi lakh 50 asütsü, iba senji Election ozüng agi candidate kati election mapang endoktsü melaba sen dang nungibo anaben agi teimba lir. Tangarbo yamaji tenlatepa nübor meimba aser mapa takok nisung election nung yaritepa adokdaksür, saka asenokbo election nung yaritepa agi, takar aika sensakertem danga taoba, alima nung ali majung sentsütsür kümdaksür. Tanü vote agütsürtem anogo nung asenokbo asenoki taoba election tashi nung candidate yariba yimya to endoker, shitakba candidate yariba inyakyim dangi meyipdi.

OLEMSABANG

CLEAN ELECTION MAPA AGI SAYUTSÜBA MAPANG

- Lemdila Peter

Nagaland nung Election ya sen saiba game ka ama dang kümogo. Shibai sen teimba lemstüdir, iba candidateji kanga adoker. Yimtsüng kar nungbo, ni crore 50 tashibo endoktetsü anungji ni candidate shimang ta ashiba lir. Sen crore aika makara electioni aitsü tamakoktsü kümogo. Candidate-tema sen melemtsüra vote magütsür. Votertemia election mapang sen tera agizüka achiba dang asüji ta tangatetba nung koda sür jenjang teimbai kü vote ayoktsü ta bilemer. Mapang talangka nungi senso candidate ya tim masü ta arogo aser lokti tentetba balalai ayimtenaka yim kar nungbo senso candidate mechi prangpong amsha raratep atalokogo. Nagaland nung mezüngbuba Khristan yimsü agizüker kin, Osangtajung arur 150 jubilee amongba küm iba tangatetba ya dang na ta alimai süngmanger.

Nüburtemi metetsüba kaji: Election nung shibai sen agi vote alitsü merangdir, pa/la jagi lokti terenlok asoshi mapa kecha meinyaktsütsü. Kechiaser pai/lai endokbaji recover sür külen, taruba taruba election atema bendentsü. Tulus kari election-i yinüa sen lema arura, mesüra crore aika endokra itemji pa/la sen masü, saka arok terenlok mapa asoshi agütsüba public sen auyaba ta metetsüla. Item amala ochimashi lenir jagi pei tepok atema dangashi lokti terenlok asoshi mapa meinyaktsü. Youth Net-i Eastern Mirror Dec 17, 2018 nung taoba election District wise nung sen endokba nung Mokokchung District kisung nung ?191,90,00,000 tim mesüi amshia chimaba osang nung angur. Ano parnok osang nungsa agütsüba agi Nagaland rangpen nung sen teimtiba achiba District tanabubaji Mokokchung ta agütsü. Sürapangla sen paikaji shir meyong, kong nungi, kechi, koda shirisa achi/chima? Item ajak senji public sent a metetdi. Item senji timi amshi nungbo, Mokokchung Dist. tejakleni or lila. Anungji lenir shibai vote sen agi alitsü merangdir, pa/lai tata menden nung amentsü malang ta shitetdi aser vote magütsüli. Seni teimba agütsür lenir masü, saka shibai pei lima terenlok, tat. agi factory, industry mesüra private sector, company yamai amenteta yutsütsü, küm pungu nung ibala terenlok mapa ya bener arutsütsü ta mangdang shitetba yimsürsür shimtsü nungdak.

Ya metetdi: Lenmang ajak teraksa/tapok (pothole) nung dang jajar; ghonda ka lenmang anogo piyong jajatsüsa akümer. Centre nungi yokba kaketshirtema sünga scholarship mangur. Sorkar School/ College/Universities akhidang lapoka aliba dang, tasen lapoka aoba maka. Tanga limabo education jenjang govermentü ajungkettsüba ajanga alima tesem aika nungi arua azünger, saka asen lima tanü putu den apetba facility magütsür. Naga nunger jenjang tamajungbai odagi. Item ajak yangi mangdang aser ochi lenir shimtsüba mapangji tang ta angatetdi.

Asen Naga lima tejakleni odaktsütsü atema, tan agitsüba election nung yabo tim masüba inyakyim tatishitsü agi sen/mapa balala yong vote ayokba, proxy voting, ochimashi, tashiyim mapatem, teyazü tenangzükbatem asen lima nung mebenshili aser vote magütsüli Senso candidate ta shir yimi sangdongdir par nemji vote magütsüli. Tamanger tajung kaka ama khenyongi item amala nung shilem magili.

Election maparen nung tetsürtemi mapa tamajung nung tasü itdaktsütsü atema teburtem dang lapii ja-a süpedi peditsütsü ta ajongmesoba, rara menaba, olulu prokba, medemtsür/ilangtsür tenteter party ajak dangi oa sen meshiba jaksü pangsu sübo-solem melenshia proxy vote agütsüba ya anendi. Tangari bendenloktsüba khuretbo mapang telemtet ka dang alir, saka pei sasa menaba tai agibo arishi metembang tashi arishir ta jembia aru. Anungji senso shia ochi shia vote agütsütsübaji tang ya lir. Shingai ashi matali, saka electionji arung, ni aser ozü kibongibo ochi nung noktaksü ta shitetdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Sayutsüngir Dhinakaran Dimapur-i arur



Dearly beloved in the Lord,
We as a family are so excited to inform you that we are coming to meet you and your family members at the

PARTNERS MEET IN DIMAPUR

We invite you to come and be blessed with your family members

Date & Time:
January 25th 2023 (WEDNESDAY) @ 2.30 PM

Venue: **SANGTAM BAPTIST CHURCH, LANE NO 15, BEHIND OLD S.M COLLEGE, DUNCAN BASTI, DIMAPUR - 797112, NAGALAND.**

"God will bestow on you a crown of beauty instead of ashes" (Isaiah 61:3)

The Dhinakaran's, Jesus Calls

For more information contact:
Jesus Calls Prayer Tower
Phone: 8826340055 / 936094051

Dimapur, Jan.24 (TYO) : Dhinakaran aser par kibong Tsüngrem ain aketba nisung ajunga Dimapur nung aruagi sayutsüngir Dr.Paul tan hopta piyong amongtsü

sentong tajung ayongzüka lir. Tamasa parnok arur külen, January 25 nikongdang 2:30 ako nungi Sangtam Baptist Church, Duncan Basti, Dimapur nung Jesus Calls Ministry nung züngsem aser yariteper kibongtem den sarasadem mapang agitsü sentong renema lir.

Iba sülen lokti sentep sentong January 28 aser 29 nikongdang shia 4:00 ako nungi 4th Mile nung Agri Expo ground nung alitsü sentong adoka lir. Iba lokti sentep sentong nung Tsüngrem o jembitsü aser shi aser tanüla nung taneptsü nüngdakertem asoshi sarasademsütsü.

Iba sentong ya Western Sumi Baptist Akukuhou Kuqhakulu aser Jesus Calls Ministry na longjemer ayongzüker. Iba sentong nung arua temoatsü aser taneptsü angutsü asoshi taruner ajak arung ta sentong ayongertemi metetdaksüogo. Iba sentong dak aketba maparentem indang metetnura mobile number 88263 40055 / 93609 04051 ajanga metetpelatsü akoktsü.

ANOGO ABEN TSÜNGREM DEN

Taochi aser Tesünep

"Asen Tebu Tsüngrem aser Kibuba Yisu Khrista nungi nenok dangi taochi aser tesünep süang."

-Rom 1:7

Efesa nung arogo teku dangi züluba shiti shia "Nenok den taochi liang, aser asen Tebu Tsüngrem, aser Kibuba Yisu khrista taochi nenok den liang" ta tenzük. Ibai Pauli taginüba o ka dang züluba masü, saka ochi temeim agi zülu. Ibai teti tesütep o talisa küm tasen ka tenzükdang ibai kanga tapet lir. Idaki ochi tulu asem dena lir, Tebu Tsüngrem, Kibuba Khrista aser tamangertem asoshi temoatsü. Asenok tesüngmangtsü mapang ka nung lidar. Mangashiba osang angashir, manguba oset angur, meimlaba tashidak agi nisung jenti asür, scientisttem raraba oset akidang meyanglutet aliba yangluteta amshir. Alima kanga dang karaa melenshia aor. Telatet kecha maka kin kati kin ka raksatsütsü teraksatsüba tashi tait oset adoker. Iba ama lima ka nung alidang asenoki tarutsü jenokdak atema bilemer aser asenok temulung alemdakji Khrista tesayuba, tematiba Tsüngrem indang tesayuba nung anisüngzüker. Ibaji dang teperi masü. Iba dang tali tematiba Tsüngremji asen Tebu lir. Ajak Pai yanglu, ajak Tebu Pa asünung alima ajunga nung aliba meimchir tembar küma tesünep nung alitsü aji Pa nükjidong. Saka ano Pauli Khristaji kibur ta amshi. Tebu aser Techir kasa dang. Tetenzük Techir Tebu den liasü, aser Pa ajanga ajak yanglu. Kibubaji teti tatem maka Tsüngrem chir, shiba dak meimchir aria bilemba Tsüngrem ain alir. Pa otsü nung kibur. Pa chuba ka ama arutsü asenoki yongya atar. Pa kodang arutsü shingai memetet- Pa taküm küm arutsüa shibai metet!

Pauli taochi aser tesünep asenok nem agütsütsü sarasadem. Item o ana ya jangratemtsü otem lir. Yangji taochi tetezü Tsüngrem temeshi temeim asenok nem agütsüba lir. Tesünep tetezü junga aliba. Aiben asenok Khristantemi asenok shidakba nüngdakji mangateter! Sen kara, temaba jenjang nung lira, sempet tulu kara, mesüra anema lira, asenok junga alitsü ta aikati bilemer! Masü, asenok shidakba nüngdakji "taochi aser tesünep" lir. Tsüngrem tenüng sangang.

DRC nung baptiba mapang Khristan 14 pokset

Nairobi, Aenjeti/January 24 (Agencies): Democratic Republic of Congo (DRC) nung January 15, 2023 nü Protestant arogo ka nung baptiba sentong agidang bomb poklokja tamanger nisung 14 takum samatsüba ya Muslim nunger telungpur mapa südi ta temolung melemteti lir, ta ketdangsür temi ashir.

DRC anüdoklen Kasindi tesem nung atalokba lendong nungya nisung 14 asü aser 63 yiru ta DRC ketdangsür temi ashir, saka yangji Uganda indang military operations odongtar Bilal Katamba-ibo Church of Christ of the Congo (Eglise du Christ au Congo mesüra ECC) nungi nisung 16 asü aser 20 yiru, ta ashi.

Iba lendong ta Allied Democratic Forces (ADF) temi agütsü südi, ta ketdangsür temi temolung melemteti lir. Ajisüaka Islamic State-i iba bomb pokloktsüba kibur kuma sangdong aser nisung 20 jungnüa tepset ta ashi.

Iba arogo nung nübu tain Paluka Kivugha-i ashiba agi, nisung ana tekülem ki telungi aita juli ka yutsü, kong IED liasü aser aji apok.

"Nisungtem anüngleni pokteta yok aser tasü ali nung alua tsük - ibai temolung shirangtsü Deobar liasü. Tekülem ki telung nung alir ajak jena aotsü meranga liasü saka karbo tetsüng poksar masetshitet," ta Kivugha-i Morning Star News dang ashi.

"Bomb yagi tanur aser par tsüraburtem tepset. Ni kanga aoksa aser temang ajunga ngua liasü, saka ni takum jenbu. Tsüngrem tenüng asanger."

Deobar tekülem sentong nung baptiba sentong agia liasü, ta arogo züngsem Salome Kavugho-i ashi.

"Laishiba anüka shisar liasü aser tesem ajaklen azü liasü, aser ni müketa azü yimshia liasü. Ni nisung memeteti akum. Ni mozüki nung shia aru," ta Kavugho-i ashi.

Arogo züngsem arishi küm 37 tain Pauni Aline teka aser tetsüng yirua liasü.

"Ni külem arogo züngsem azü agi melangbanger angu, aser kar tekangshi marem jeba liasü. Ni takum lir aser Tsüngrem dang pelar," ta Aline-i Morning Star News dang ashi.

"Khristanpur ajema kumdaksütsü aser temolung nung tetsüba aita daksütsü mechi iba mapa ya inyak," ta arogo züngsem Peter Masika-i Morning Star News dang ashi.

ECC ya DRC nung Protestant denomination 62 agi tentetba telok ka lir aser yangji züngsem million 25.5 lir aser parnok dang Protestant Church ta ajar, kechiaser yangji linük indang Protestant timba dena lir.

ADF ya tesashitiba ta züngshir, aser parnok ya DRC anüdoklen telungpur telok 120 dak tema agi tentetba lir. Parnok ya Uganda nung amenoka lir aser 1990s tatemlen nungi arütsü anasa DRC indang North Kivu Province nungi inyaksangshir. Uganda sepai aser DRC mitkar lungjemer ADF anema rara arur.


2019 küm ADF ya telok ana kuma sadang aser ka Islamic State Central Africa Province den loktep. US sorkari 2021 küm ADF ya Islamic State den sendaktepba bendanger

kiralongrar telok ka ta tenüng jaloktsü.

Open Doors indang 2023 World Watch List nung Khristan ka alitsü asoshi tamajungtiba linüktem asadanga nung DRC ya jenjang 37 buba nung lir, koba taoba küm jenjang 40 buba nung liasü.

Iba linük nung Muslim nunger nütsüng yongsük shilem 3 aser Khristanpur shilem 85 lir.

Kentener Dante Bowe-i maneni tekülem ken atentsü



Dante Bowe

Aenjeti/January 24, 2023 (Agencies): Award balala nguteta ken atener aser ken mejemer Dante Bowe mapang tatsüka anisüngzüka sülen Gospel aser Christian music dangi tanaben meyipa shilanger.

Bowe ya taoba mapang Maverick City Music nung züngsem liasü aser pa wadang tejakleni aotsü sentong indang CBN News/Studio 5 den jembia liasü.

"Tesüiba ita ishika ya ni atema khenyongi balaka liasü. Ni temang tang tajungba. Tangsa tajungba. Tesangwaba. Tsüngrem anasa lir. Hau ni junga

lir," ta pai CBN News dang ashi.

2022 küm September ita Maverick City Music ajanga sangdong ka nung parnok tesendaktep nung khen asoshi anena ataba nung shilem ka ama Bowe ya agientsü, ta shia liasü.

"Onok tamangba aser tamendakba den yimya kasa maliba ajanga onoki Dante Bowe den ozü tesendaktep khen asoshi anena atatsü lemtet," ta iba telok yagi sangdong ka nung shia liasü.

"Iba amala telemtetba ya agitsü temela masü, kechiaser maparen tsütsü aser jurila tsütsü tetsükdaksü lir, saka aji angateteptsü nüngdak ta bilemer."

Mapang tatsüka lir Bowe-i yimjak aser social media account tem nungi khen anisüngzüka alitsü sangdonga liasü.

"Tawa atalokba dak sendakba nung ni shisa taka lenirtem aser kü adianutem den jembigo. Tekolok shisatsü aser temang shi anisüngzüksü asoshi social media mamshi alitsü," ta pai shia liasü.

Bowe-i taoba mapang Bad

Bunny aser Lil Nas X ken ajungkettsüba mechi Bowe aser Maverick City Music ya pila südi ta temolung melemi bilemer. Pai ashishitsüsa ken kar nung pa tsüngsangba video tem social media nunga lemsatepa liasü.

"Nü indang taruba mera tongtsütsü asoshi Tsüngremi nisungtem amshitsü. Anungji mataloktsü kar atalok ama ni mebilemer. Kechiaser kü den teyariteper tajung lir. Ni ki-o-jen tajungba yanglushiogo aser yangji producer John John dena lir, shiba teyari nung 'Hide Me' aser Press Play kensep ajunga saya," ta pai ashi.

Tatidang balala arur saka item ajakji amajok masür. Kecha amajok masü, ta ashi.

Bowe indang ken tasenba 'Hide Me' ya ita tetenzüklen sayaogo.

"Tulusang Tsüngrem akumbok nung ni lia aru. Ni kumzüka ali ama aser Pa anasa ali ama bilemer. Nisung aikati ni jashia alitsü südi ta bilema alitsü akok. Saka asangsang nung Tsüngremi ni kumzük," ta Bowe-i CBN News dang ashi.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Oremta

(adj) tajunga masü, majunga masü, tetsüngda ka (middling)

*Asenek rongnung **oremta** pur teimba lir.

Oren

(v) ojang kaka medentepba agi akümba o (sentence)

* Onoki kaketreju nung ojang agi **oren** yanglutsü angazük.

OLONG PAITEP # 6409

	1			2		3	4
5						6	
7		8					
						9	
	10						
11							12
				13			
				14			
15							

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenu'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenung ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6408 TELANGZÜBA


TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan,
- 13. Tinu.

Agüja aliba noksa nung meputepi aliba 8 bushiang



Happy Birthday

Tenung : MOLUNGNEN TZÜDIR
 Küm : 7
 Talidak : Luse Khel, Naga United Village
 Odi MOLUNGNEN TZÜDIR sor küm 7 tashi anema tokja kakete reju nung takok tajung nguteta aser temoatsü nung len aniba asoshi Tsüngrem tenüng asanger. Maneni areshi talang anema aliba takum moajang ta sarasatemtsür.
 ~ Temeim Akümdong Tzüdir, Kinnaren Tzüdir



Manipur BJP state leader Laishram Rameshwor Singh khaset

Imphal, January 24, 2023

(Agencies): January 24 nü Bharatiya Janata Party (BJP) Manipur ex-servicemen cell general secretary Laishram Rameshwor Singh khaset.

Thoubal Kshetri Leikai nung Laishram ya par kidang lia mejangjatetba nisung kari anepdang 10.20 ako nungi 11.30 ako tsüngda injang khaloktsü ta police-i metetdaksü.

Iba tatalokba sülen pa Raj Medicity nung aniok saka pa nikongdang 1:00 ako meta asü. Iba sülen pa temang Jawaharlal Nehru Institute of Medical Sciences nung post-



Laishram Rameshwor Singh

mortem atema bener ao. Osang angazükba agi nisung ana SUV gari ka arur Rameshwor dak injang khaloktsü aser jena ao.

Iba gari indang driver ya police-i apu aser pa dang asüngdangya asü dang Rameshwor dak injang khaloktsüsangji Haobam Leirak nungi Keshorjit ta jangja.

BJP Manipur Pradesh General Secretary Deveni iba tatalokba khukhua aitsüogo.

"Kecha masüba nisung ka tepsetba ya lapi mapa lir. BJP Manipur Pradesh-i iba tatalokba khukhua aitsür" ta pai ashi.

Police-i bushisüngdang ka tenzüko aser aibelenertem aputsü atema merangdar.

2024 Lok Sabha election nung Assam BJP tajungba asütsü

Guwahati, January 24, 2023

(Agencies): 2024 Lok Sabha elections nung BJP-i Assam nung menden teimba nung takok angutsü ta Assam Chief Minister Himanta Biswa Sarma-i ashi.

2019 Lok Sabha elections nung Assam nung BJP-i Lok Sabha menden 14 nungi 9 nung takok ngua liasü.

"Onok senden nung election indang dang mejembi saka party tashi itsütsü indang jembi" ta

Guwahati nung state BJP executive senden amenba sülen CM Sarma-i ashi.

"Lok Sabha election mopung ano maon, anungji tangbo menden kwi nung takok angutsü'ar meshitetsü" ta pai ashi.

"National executive senden nung jembiba onüktem benoka jembio aser itemji booth jenjang tashi nung metetdaksütsü. Tang Assam nung delimitation mapa inyaker

aser iba ya tembangna constituency tem balala asütsü. Iba ya meinyaktetra balaka asütsü. Anungji tang atemabo menden telemsa indang mejembiteter" ta CM Sarma-isa metetdaksü.

Assam nung delimitation asüba sülen Assembly constituency bo kasa (126) dang asütsü. Iba ajanga nisung shinga tsütsü mashir mesüra tajangzük mangur, ta paisa shisem.

Meghalaya assembly elections atema TMC-i manifesto sayaogo

Shillong, January 24, 2023

(Agencies): Meghalaya assembly elections atema Trinamool Congress (TMC)-i manifesto sayaogo.

January 24 nü TMC national general secretary Abhishek Banerjee lia Meghalaya TMC-i election manifesto saya.

Meghalaya TMC-isa Meghalaya nung assembly elections atema tezüngzüktep 10 sayaogo.

"TMC indang election manifesto ya pungmang masü

saka asangsang lir" ta Meghalaya leader of opposition aser TMC lennir Mukul Sangma-i ashi.

Meghalaya TMC-isa sayaba tezüngzüktep 10 nung health infrastructure, rongsenketzüng aser sensaktia agientsüba indang shia lir.

Meghalaya TMC-isa Assam o Meghalaya tsüngda arrtsü MoU meyipa agitsü, power sector yanglushitsü aser education, sports, tourism tajungba akümtsü indang

tezüngzüktep agiogo.

Onok indang tezüngzüktep 10 ajanga Meghalaya nung alirtem taküm melenshitsü, ta taoba Meghalaya chief minister Mukul Sangma-isa ashi.

"Ozü party-i dang jembiba ama inyaker. Onoki tezüngzüktep agiba shiaji onoki sorkar akümba sülen inyaksü" ta TMC national general secretary Abhishek Banerjee-ia ashi.

Onoki Meghalaya ya model state ka kümdaksünür, ta Banerjee-isa ashi.



Jawa Yezdi Motorcycles-i Arunachal Pradesh nung Jawa 42 indang Tawang edition tasen sayaogo. Iba edition ya Arunachal Pradesh nung 100 units dang lapoktsü aser northeast state nung bike sapurtemi amshitsü akok. Tawang nung Torgya Festival amongdang Jawa 42 indang Tawang edition sayaogo. Tawang edition ya Jawa 42 Version 2.1 indang jenjang nungi Rs 20,000 agi talila lir. Jawa 42 Version 2.1 indang jenjang ya Rs 1,94,142 (ex-showroom) lir. "Jawa 42 bike indang Tawang edition ajanga Northeast indang tobur ajungba sayur. engineer temi Lungta motif enokba atema tenüngsang agütsür" ta Arunachal Pradesh CM Pema Khandu-ia ashi.

Yanomami kin nungi tanur jenti asüba sülen Brazil-i emergency sangdong



Brazil-i emergency sangdong sülen Brazil Tir Luiz Inacio Lula da Silva-i Boa Vista, Roraima state nung Yanomami Indigenous Health House (CASA Yanomami) semdangba mapang tangokba noksa nung angur.

Brasilia, Aenjeti/January 24 (Agencies): Venezuela den arrtsüa aliba Yanomami territory kong Brazil indang lisopur timba wazüka yua ali, yangji ozüing alema hon atoba ajanga tashidak adoka aser achi-ajemtsü peria maliba ajanga tanurtem asüba osang angazükba sülen health ministry ajanga medical emergency sangdong.

Tir Luiz Inacio Lula da Silva indang sorkar tasenbai Hokulbarnü ozüing ka sangdongba nung, par jakdang inyaka alisang Jair Bolsonaro-i Yanomami nübur asoshi health services raksatsür aliba tasen kuma yanglushitsü nükjidong nung iba ozüing ya sangdonger, ta ashi.

Bolsonaro küm pezü tashi tir inyaka aruba mapang Yanomami tanur 570 tashi taneptsü ngutetba tashidak agi asü aser item rongnung talisa achi-ajemtsü agi meperiba ajanga lir, saka ano

ramen, saksü-pokshi aser hon atortemi amshiba mercury ajanga temang nung timtem agüja asüba lir, ta osang ka ajanga ashir.

Noksa kar nung tanur aser teintet rogotem tesaret ajiteta kongrar aliba noksa prokshiba sülen Lula-i Roraima state kübok Boa Vista nung aliba Yanomami health center ka Honibarnü semdanga liasü.

"Humanitarian crisis dang tamajungba, ni Roraima nung anguba ya kin ajunga okshia samatsütsü merangba lir: Yanomami anema jelia tasa tamajung yanglur inyakba lir, koba nüburtem timtem asoshi mebilemba sorkari inyak," ta Lula-i Twitter nung ashi.

Sorkari chiyongtsü agütsütsü sangdong aser itemji Portugal teka arem min nung Yanomamis nunger 26,000 shi alidaki tayimtsü nung bener oa agütsütsü.

Iba arem wazüka aliba ya ozüing alema hon atortemi küm aika maka arur saka 2018 küm Bolsonaro tir akumba sülen ali rakzükba tali akum, kechiaser pai tesüiba mapang wazüka aliba ali nung hon todaktsütsü nangzüka liasü.

Yangji ano telok balalai shilem agia mapa tamajung inyakba ajiteter. Tawa item tesem nung nisung kar ayong nung kanga kera jajaba rong tila nung mener arua hon ator aitba anema nokdaker dak injang khalokja liasü.

Lula sorkari ozüing kar benoktsü tetsübo nung hon ator karbo ainshigo aser anasa aliba Guyana aser Suriname leni aor ama ajiteter, ta Instituto Socioambiental nung research agir Estevao Senra-i ashi.

Sorkar tasenbai ozüing alema hon atoba anema nokdaka iba maparen tatem kati arudaktsütsü aser Amazon nung ozüing alema arem chidoker pua merenshitsü, ta Lula-i ashi, koba Bolsonaro yimsüsüba kübok tali akum.

"Nisung taintem temang tuozük tanur ama kumdaktsüba aser tanurtem takep aser teret kisüing akumtsüsa tensa aiddaktsüba asoshi taoba sorkar khuret asütsüla," ta Ministry of Indigenous Affairs tasenba nung tekolakba aser lisopur tetsürtem rongnung cabinet minister mezüngbula Sonia Guajajara-i ashi.

Aoli Longchar Kidong

HQ: Mokokchung

AOLI LONGCHAR KIDONG MEETING ALITSÜ SANGDONGER

Tamasa Aoli Longchar mendenti ajanga ajak dangi küm tasen salem lemsateper. Iba den külemi kidong asoshi teinyaktsü wadang tulu alinung 30th January, 2023 anepdang 10 ako nungi kimen kidang meeting akatsü. Anungji mazüngi dang liaka iba anogo nung shinga absent mesüi arua atentsü metetdaksür.

Sd/-
L. Imdong
Tatong Tir
9856814386

Sd/-
Aren Longchar
Tongti Zülur
7085198354

SANGDONGER

Aküm taket Aolisanger ajak dangi CAO Ao Region melentepa osang agütsür. Mr. Bendang Jamir Tatar, pa CAO menden nungi kümsük agi abensa nung pa melena NSCN/GPRN kilo office ajanga Mr. Lanuwati Jamir, Deputy Kilonsor CAO/caretaker khu melenzükogo. Anungji nüngdak mapa, lenmang ajak nung tongtepratep asütsü metetpelar aser nenok tamang sarasadem aser teyaritep aginer. Külem teka amteper Naga kin asoshi inyaktsü tayongzükba sangdong CAO office nungi lemsateper.

Sd/-
Lanuwati Jamir
CAO Ao Region
GPRN

ALI AYOKTSÜ LIR

Foothill Road nungi 2 minutes
Hozukhe Village - Rs. 25 per sq.ft.
Ph. No : 8798384967 / 2859001052

75th Azadi Ka Amrit Mahotsav

74th REPUBLIC DAY Celebration

ON 26th JANUARY, 2023 AT NAGALAND CIVIL SECRETARIAT PLAZA, KOHIMA

0600 hrs: Unfurling of National Flag in all Government Offices, Institutions/Public & Private Buildings.

0850 hrs: Review of Parade by DGP, Nagaland.

0900 hrs: 1. Hon'ble Governor arrives, unfurls the National Flag, takes Rashtriya Salute and inspects Parade.
2. Address by the Hon'ble Governor.
3. Presentation of Awards.
4. March Past.

PARADE CONTINGENTS:

- 1 Assam Rifles Bn
- 2 78 Bn CRPF
- 3 37 Bn BSF
- 4 Assam Police
- 5 DEF Kohima
- 6 4th NAP Bn
- 7 10th NAP (IR) Bn
- 8 15th NAP (IR) Mahila Bn
- 9 Home Guards & Civil Defence & SDRF
- 10 NAP Rangers
- 11 Nagaland Police Training School Brass Band
- 12 Nagaland Police Auxiliary Brass Band
- 13 15th NAP (IR) Mahila Pipe Band

Parade Commander : Shri Z. James Sema, NPS. Dy. Commandant, 4th NAP Bn
2nd in-Command : Smti R. Tunyi, NPS. Asstt. Commandant, 4th NAP Bn

CULTURAL PRESENTATION

1. Dance Performances : a. Hawaon Mein Woh Aag Hai
b. Kadam Kadam Badhaye Ja
Women Resources Development Deptt.
2. Tati Folk Song : Kevira Cultural Troupe, Kohima Village
Art & Culture Deptt.
3. Traditional Folk Dances : a. Pochury Cultural Troupe, Kohima
b. Shena(old) Cultural Troupe, Kohima
c. Konyak Cultural Troupe, Kohima
d. Phom Cultural Troupe, Kohima
Art & Culture Deptt.

INAUGURATION OF EXHIBITION STALLS BY THE HON'BLE GOVERNOR

VISIT OF INSTITUTIONS BY CHARITABLE ORGANIZATIONS

1. State Mental Health Institute : Royal Club, Kohima
2. Kohima Orphanage & Destitute Home : Gorkha Public Panchayat, Kohima
3. District Jail, Kohima : Muslim Union, Kohima
4. District TB & Chest Disease Hospital, Khuzama : Lions Club, Kohima
5. Naga Hospital Authority Kohima(NHAK) : Kohima Chamber of Commerce & Industries (KCCI)
6. Old Age Home : Spikes Club, Kohima
7. KRIPA Foundation : Kerala Club, Kohima

Distribution of Sweets at Parade Ground by Dobashis of DC's Office, Kohima

EVENING PROGRAMME AT SECRETARIAT PLAZA

1430 hrs: Football Exhibition Match
IGS Academy Girls XI vs NASA 'C' Girls XI

1600 hrs: Prize Distribution

1615 hrs: Band Display

1. Nagaland Police Training School Brass Band
2. 15th NAP (IR) Mahila Pipe Band
3. Nagaland Police Auxiliary Brass Band
4. 1 Assam Rifles Pipe Band

BEATING OF RETREAT

"ALL ARE WELCOME"



Election Commission of India
wishes all Voters on the occasion of

13th NATIONAL VOTERS' DAY

25th January, 2023



Theme :

Nothing like Voting, I Vote for sure



Chief Guest
Smt. Droupadi Murmu
Hon'ble President of India

Guest of Honour
Shri Kiren Rijiju
Hon'ble Minister of Law & Justice

Highlights of the Event

- Awards
Best Electoral Practices
- Distribution
EPIC to First Time Voters
- Release of ECI Song
Main Bharat hoon, hum Bharat ke Matdata hain
- Presenting to the Hon'ble President of India
'Electing the First Citizen- An Illustrated Chronicle of India's Presidential Elections'

Technology enabling Free and Fair Electoral Process













FB.com/ECI
@ecisveep
youtube.com/eci
@ecisveep



ICC tetsür aser tebur T20I teams of the year sangdongogo



Aenjeti/January 24, 2023 (Agencies): ICC-i 2022 kum atema tetsür aser tebur T20I teams of the year sangdongogo. Tebur team nung India nung asayartem rongnungi Suryakumar Yadav, Virat Kohli aser Hardik Pandya densema lir aser tetsürtem rongnungi Smriti Mandhana, Richa Ghosh, Deepti Sharma aser Renuka Singh nung women's XI nung densema lir.

2022 kum Kohli-i run 781 yanglur aser pa indang strike rate average 138.23 liasü. Pasa taoba kum half century ti yanglu aser pa indang career nung T20I nung mezüngbuba century yanglua liasü. Suryakumar Yadav ya taoba kum India nung batter tem rongnungi

tajungtiba liasü. Pai ajak senteper run 1164 yanglu aser pa indang strike rate 187.44 liasü. Pai half century teku aser century ana yanglua liasü.

2022 kum ya Hardik Pandya asoshi kanga junga asayaba kum ka liasü aser pai half century ana densema run 607 yanglua liasü. Pa indang average 33.72 aser strike rate 145.91 liasü. Bowling nunga pai wicket 20 agi aser pa indang economy rate 8.50 liasü.

Kasa mapang nung tetsürtem rongnungi India team opener Mandhana-i 2022 kum half century pongu densema run 594 yanglu aser la indang strike rate 133.48 liasü. Taoba kum team-i takok ngua asayaba nung lai tongtibang shilem agiogo.

Deepti Sharma-i taoba kum

team atema batting aser bowling naprongla nung tongtibang shilem agiogo. Taoba kum lai run 370 yanglu aser wicket 29 agia liasü. La indang strike rate 136.02 liasü.

Maneni Renuka Singh-ia bowling nung India team atema tongtibang shilem agiogo, lai kum tepeyong nung wicket 22 tashi agia liasü.

Wicketkeeper-batter Richa Ghosh-i asaya 18 nü run 259 yanglu aser la indang strike rate 150 liasü. Lai taoba kum six 13 azük aser lower order nung team atema tongtibang shilem agiogo. Taoba kum lai tajungtiba asayabaji Brabourne nung Australia den asayaba mapang liasü. Iba asaya nung lai out mesüi ball 19 nung run 40 yanglua team jenjang ajungkettsü.

ICC Men's T20I Team of the Year: Jos Buttler (C/WK), Mohammad Rizwan, Virat Kohli, Suryakumar Yadav, Glenn Phillips, Sikandar Raza, Hardik Pandya, Sam Curran, Wanindu Hasaranga, Haris Rauf, Josh Little.

ICC Women's T20I Team of the Year: Smriti Mandhana, Beth Mooney, Sophie Devine (C), Ash Gardner, Tahlia McGrath, Nida Dar, Deepti Sharma, Richa Ghosh (WK), Sophie Ecclestone, Inoka Ranaweera, Renuka Singh.

FROLIC CUP 2023 asaya anogo melenshir

Dimapur, Aenjeti/January 24 (TYO): 8buba FROLIC CUP 2023 koba January 30 nü nungi asayatsü liasü, iba asayamung ya mepaitoktetba tensa kar ajuruba ajanga February 1 nü nungiang tenzüksü, ta Media &

Publicity Ketseivikho Kuotsu-i sangdong ka ajanga metetdaksüogo.

Anogo melenshiba ajanga tetsükdaksü adokdaksüba atema kanga sasa bilemba club-isa metetdaksüogo.

Football asaya nung mezüngbuba 'white card' sayuogo

Aenjeti/January 24, 2023 (Agencies): Portugal nung Benfica aser Sporting Lisbon tetsür team asaya ka nung tang mezüngbuba referee-i 'white-card' ka sayuogo.

temang mejungi aliba fan ya yatitsü atema aritepa oa liasü. White card ya parnoki 'sportsmanship' tajung sayuba atema sayua liasü.

1970 FIFA World Cup nungi tang tashi nung football fan temi aibelenba asayartem dang referee-i yellow card aser red card sayuba dang ngua aruogo. Ajisüaka iba asaya nung football puti otsü nung tang mezüngbuba white card ka sayua liasü.

JOE sangdong ka ajanga ashiba agi, white card ya asaya mapang club temi asayar yimya tajung benshia asayaba aser inyaksangshiba reprangtetba temaitsü sayutsü atema design asüba lir. Iba ajanga asaya yimya tajungba akümtsü imlar.

Portugal nung tetsürtem cup asaya ka asayaba mapang asaya mezüngbuba shilem tembangtsü lia asaya reprangi arur ka temang mejungi akümba sülen iba ya ataloka liasü.

Tawa Portugal nung FIFA inyakyim tasen aika den külemi white card amshitsü atema benokogo. Alima ajunga nung football asaya achayangba lokti tentet yagi concussion substitutes dena benokogo aser stoppage time talangba agütsü tenzükogo, koba Qatar nung 2022 World Cup asayaba mapang group stage asayatem nung ajangshiogo.

Referee-i team anaprongla indang medical team dang white card sayu, shirnoki

BILEMDANGANG

"Ochibo kechi südir süka jungkai adoker."